



PRIMEIRO MINISTRO

**ALOKUSAUN SUA ESELÉNSIA
PRIMEIRU-MINISTRU REPÚBLIKA DEMOKRÁTIKA TIMOR-LESTE,
DR. RUI MARIA DE ARAÚJO,
IHA BIBAN SERIMÓNIA KAHE MEDALLA
ORDEM TIMOR-LESTE**

Díli
23 maiu 2017

Eselénsia

Señor ex-Prezidente Repúblika Demokrática Timor-Leste no Prémiu Nobel dame nian, Dr. José Ramos-Horta

Kolega membru Governu nian sira

Belum di'ak António "Tony" Cabral

Reprezentante Kombatente Libertasaun Nasional

Distintu konvidadu sira

Señora no Señor sira,

Ha'u agradese ba Señor kongresista António "Tony" Cabral ne'ebé maka hi'it an ona mai Timor-Leste. Mai ami hanesan motivu ksolok nian ida hodi simu Ita Boot nia vizita, no iha ha'u nia kazu, atu hasoru hikas fali hafoin ba dala ikus ami hasoru malun iha Estadus Unidus Amérika.

Título onorífiku ne'ebé fo ba ne'e tanba reprezenta rekoñesimentu públigu ida, sempre sai motivu atu kontente, la'os deit hosi parte ne'ebé simu kondekorasaun maibe mos hosi ema ne'ebé inkumbidu iha hahalok distintu ida ne'e.

"Ordem Timor-Leste" maka kondekorasaun ne'ebé ho prestíjiu no dignidade boot liu, ne'ebé harí atu "rekoñese no agradese ba ema nasional no mos estranjeiru, ne'ebé, tanba ninia komportamentu ka tanba hahalok hirak ne'ebé kontribui maka'aas tebes ba país, ba ema timor oan ka ba Umanidade." (Artigo 2º, nº 1 do DL nº20/2009).

Ami hetan sorti iha, durante ami nia luta, bele konta ho apoiu hosi kongresista balun, ne'ebé ninia influénsia determinante tebes iha apoia ami nia kauza. Ho orijen portugés, Kongresista iha Kámara Reprezentante Estadu Massachusetts Estadus Unidus Amérika, António "Tony" Cabral, nia iha istória naruk ida iha apoia Timor-Leste, inklui durante luta ba independénsia.

Nia la kole defende direitu no liberdade povu timor nian sira iha nível ás liu iha Estadus Unidus Amérika no, tuir lee tiha ona iha Dekretu Prezidensial, nia mos lidera apresentasaun lejislasaun iha Asembleia Lejislativa Estadu Massachusetts nian iha sansiona empreza no negósiu hirak ba, ka hasoru, Repúblika Indonésia iha remata dékada 90.

Iha altura ne'ebá, korajen, empeñu no determinasaun ne'ebé António "Tony Cabral" hatudu ona ne'e sai hanesan determinante atu enkoraja rezolusaun internasional ida ba krize Timor-Leste nian.

Lós tebes katak independénsia timor nian bele sai posível tandem determinasaun no reziliénsia hosi Povu Timor, maibé, apoiu hosi ita nia belun no parseiru sira iha mundu rai klaran kontribui ona, ho forma ida signifikativu tebes, atu belok tiha dalan hirak ba akontesimentu sira iha Timor-Leste haré hosi independénsia ida ne'e.

Hahú hosi tempu ne'ebá, "Tony" Cabral kontinua nafatin sai belun di'ak ida no servisu hodi promove dame no estabilidade, la'os deit ba Timor-Leste maibé mos ba rejiaun. Ninia haka'as an ne'ebén konsagra ba haforte demokrasia no ba dezenvolvimentu Timor-Leste nian, inklui reforsa relasaun hirak amizade no kooperasaun nian entre Repúblika Demokrática Timor-Leste ho Estadus Unidus Amérika, merese atu hetan rekoñesimentu hosi Estadu Timor-Leste.

Ba buat hirak ne'e hotu, Sua Eselénsia Señor ex-Prezidente Repúblika, Taur Matan Ruak, tau ona iha Dekretu, liu hosi Dekretu Prezidente Repúblika nº8/2017, loron 22 fulan fevereiru, kondekorasaun ho grau Medalla Orden Timor-Leste nian, ba ita nia belun ida ne'e, António "Tony" Cabral, ema ne'ebé maka ita ho ksolok tebes simu nia iha Díli.

Sua Eselénsia Señor ex-Prezidente Repúblika, Taur Matan Ruak, iha altura ne'ebá sei hala'o hela ninia funsaun sira no tanba nia pesoál labele hala'o ida ne'e, maka nia delega mai ha'u atu tara Medalla, grau onoráriu Ordem Timor-Leste nian, ba ilustre Kongresista António "Tony" Cabral.

Tanba ne'e, haré ba ninia kontribuisaun ne'ebé la hatene kole iha luta ba ita nia independénsia, maka ho ksolok tebes ha'u tara Medalla Ordem Timor-Leste nian ida ne'e ba iha belun di'ak, António "Tony" Cabral.

Obrigadu barak no, dala ida tan, benvindu mai Timor-Leste no ha'u hein katak Ita Boot bele hetan estadia di'ak iha ne'e.

Dr. Rui Maria de Araújo

23 fulan maiu tinan 2017